

Enqual problem ei aunc da sligiar

La suprastanza communal da Mustér lavura cun consequenza vid il project per far il center dil vitg pli attractivs. Aunc ei denton bia el tgaun ni silpli sin pupi. Sper plazz da sentupada eis ei era pusseivel ch'ei dat en quei connex ina nova varianta cun in'otra localitad per Sedrun Mustér Turissem. Ina dallas nuschs diras ei il problem dils parcadis che sedat en connex cun crear niev spazi da sentupada.

HANS HUONDER/FMR

La vischnaunca da Mustér ha definiu en sia strategia 2030 la visiun: «Viver attractiv». Tenor quella visiun ei vegnida sviluppada la finamira strategica 2030: «Augmentar l'attractivitat da Mustér sco liug da habitar». En siu program legislativ 2021-2024 ha la suprastanza communal fixau la finamira concreta da scaffir in attractiv center dil vitg sco spazi da viver, sentupada e sviluppar il commerci. En collaboraziun cun ina gruppa da lavur ed in biro specialisau ein in tschuppel ideas ed ils emprems pass vegni dilucidai. Il concept cuntegn en total 18 differentas mesiras per augmentar l'attractivitat dil vitg da Mustér. Quella lavur ei vegnida presentada l'entschatta november alla publicitad. En sia davosa seduta ha era il cussegl da vischnaunca priu enconuschientscha dil concept. Da principi less la suprastanza communal promover loghens da sentupada el vitg e far il traffic pli ruasseivels. Ina part essenziala dallas ponderaziuns e finamiras ei igl areal Hess amiez il vitg.

«Spitgein sin in termin»

Il settember 2022 ha la suprastanza communal sutmess in'offerta als possessurs digl areal Hess el center dil vitg. «Quel ensiara igl entir areal culla casa, mo era igl ulteriur possess da terren agricol dalla famiglia», di il president communal René Epp sin

damonda dalla FMR. La suprastanza communal spetgi uss dils possessurs – ina cuminonza d'artavels – la proposta per in termin per ina seduta: «En quella lessen nus discussiunar nosa offerta.» Il prezi offeriu corrispunderia a cundiziuns da fiera. Entochen miez digl onn sper la suprastanza communal da haver ina soluziun per la cumpra. Igl areal Hess amiez il vitg cumpeggia buca mo la casa imposanta, mobein era in prau cun plontas. Sin quella parcella seschess ei scaffir interessanta infrastruttura, seigi ina zona da sentupada ni per exempel era in baghetg per commerci e habitar.

Biaras ideas

Il concept per far il vitg pli attractiv preveda plirs loghens da sentupada. «Il proxim temps vegnan ideas per singuls loghens concretisadas: A Cons, Nani Bazar, Casa communal, Vitg e Via sursilvana», di René Epp. Il mument seigi ei aunc buca clar, tgei che succedi cul baghetg dil Nani Bazar ch'ei en possess dalla vischnaunca: «Ei dat ideas da spazzar el, mo era da salvar el pervia da sia terrassa.» En mintga cass duei la situaziun pils pedunzs cun in passapei vegnir migliurada leu. La fontauna pader Placi à Spescha che sesanfla sper la Casa Hess duei

vegnir spustada sil plaz sper la casa communal. Leu vul la suprastanza communal far ina correctura dalla via cantunala. Persuenter stuess ina surfatscha dils parcadis sper l'apoteca e la casa communal vegnir nezegiada. «Cun ina correctura savessen nus migliurar la situaziun dil traffic, en special la sbucada ella via che meina alla staziun», di René Epp. Per ina tala soluziun seigi ei denton necessari da haver il consentiment dils possessurs dils parcadis. Ils plazz da sentupada futurs duein esser formai cun plontas e bauns. El contuorn dils plazz dalla casa communal vesa René Epp era la pusseivladad d'in café ed eventualmein era ina soluziun cun in biro per Sedrun Mustér Turissem. Tenor René Epp ei la localitad alla staziun da viafier buca secumprovada per quei survetsch al turissem.

Il problem dils parcadis

En consequenza dil nez futur da plirs plazz sco loghens da sentupada ni era per eveniment vegnan era parcadis a svanir. Co e nua che quels vegnan remplazzai ei il mument aunc buca clar e fuorma ina part dil concept. «En quei connex duvrein nus era il consentiment dils possessurs, mo nus essan persuadi ch'ei dat soluziuns», di il president communal. Emprems parts dil concept per loghens da sentupada el vitg duein vegnir realisadas sil pli tard igl onn 2024. Entochen lu han las instanzas cumpetentas da tractar ils projects e sclarir la finanziaziun.



Survista grafica dil vitg da Mustér. En brin loghens existents, respectivamein previ sco loghens da sentupada.

VISUALISAZIUN VISCHNAUNCA MUSTÉR

Ils truffels pigns dattan hockey sco ils gronds

Dabia affons sediverteschan en Surselva sil glatsch e giogan hockey. La dumengia vargada han els per l'emprema ga saviu semiserar al Truffli cup a Flem. In turnier per affons e juniors organisau dils clubs da hockey da Trun e da Flem.

ANDREAS CADONAU/FMR

«Gie, nus essan fetg cuntents ed il resun ei ordvart positiv.» Mischa Kupka tgira per il Club da scursalets da Trun la partiziun d'affons e juniors e quei fa Roland Auer per il EHC Flem. Els han plidentau igl emprem turnier per affons e juniors e juniors, il Truffli cup dalla dumengia vargada a Flem. «Demai che nos partizipants als cuors d'affons e juniors separticipeschan buca ad in campiunadi han els era buca la pusseivladad da semiserar cun affons e juniors dad auters clubs.» Quei han Roland Auer e Mischa Kupka vului midar ed han perquei organisau in turnier. Il num Truffli simbolisescha ils truffels per part detg pigns che sediverteschan cun scursalets sil glatsch. «El num Truffli sezuppan aunc ils nums da Trun e Flem», menziuna Mischa Kupka. Ed a Trun ei gia in emprem turnier staus planisau mezz schaner 2023. Per displascher da Roland Auer: «Ei quei turnier daventaus l'unfrenda dallas temperaturas meigivlas.» Il glatsch natural a Trun/Pustget ei buca staus a disposiziun, aschia che las hockeyanras ed ils

hockeyaners sursilvans entochen 15 onns ein semiserai la dumengia vargada per l'emprema ga a Flem/Prau la Selva.

Grond entusiassem

In'egliada ella halla da glatscha a Flem/Prau la Selva la dumengia vargada ha spert tradiu il grond plascher e la motivaziun da giugar hockey dils biabein 70 affons. «Els han giugau en treis differentas partiziuns da vegliadetgna», declara Mischa Kupka. In

«Igl interess per il sport da hockey en Surselva crescha.»

Mischa Kupka,
Club da scursalets Trun

giug ha cuzzau 15 minutas e mintga equipa ha saviu giugar quater giugs entochen ch'ils victurs da mintga partiziun ein stai erui. «Il plascher da giugar hockey ei staus el center», manegia Roland Auer. El e Mischa Kupka sentan dabia interess en Surselva per il giug da hockey. Biabein 50 affons da Panaduz entochen Glion separticipeschan als trenaments da hockey per affons e juniors a Flem. Ed ils cuors e trenaments che Mischa Kupka e ses gidonters porschan a Trun carmalan circa 30 affons

da l'entira Surselva. «Igl interess per il sport da hockey en Surselva crescha.» Quei senta ton Mischa Kupka sisum da Surselva sco Roland Auer egl intschesch digl Uaul grond.

Engaschi da trenadras e trenaders

Igl interess per il sport da hockey tier la giuventetgna ed ils affons en Surselva po vegnir svegliaus e mantenus sche pliras personas ein prontas da s'engaschar per quei sport. Ton Roland Auer sco Mischa Kupka han fideivels gidonters che stattan a disposiziun per porscher ils trenaments regulars da patinar e giugar hockey. Roland Auer e Mischa Kupka paran era dad esser prompts da cuntinuar cul Truffli cup. «Nus vegnin secapescha ad analisar igl emprem turnier e mirar tgei ch'ei secumprovau e tgei buca.» Ed ils dus promoturs dil hockey sil glatsch en Surselva san senz'autoer s'imaginar d'augmentar il radius d'accziun. «Gie, ei sa esser che nus envidein ulteriurs clubs da hockey da separticipar al proxim Truffli cup» gi Roland Auer. Il num Truffli cup vegn pli probabel a restar.



Roland Auer e Mischa Kupka (da sen.) han organisau igl emprem turnier da hockey per affons e juniors en Surselva.



Grond entusiassem e plascher e bia dinamica ein stai da veser sil glatsch a caschun digl emprem Truffli cup a Flem/Prau la Selva la dumengia vargada.

FOTOS ANDREAS CADONAU